

**შეზღუდული შესაძლებლობის მქონე პირთა სოციალური დაცვის პროგრამა**

(ქვეპროგრამის კოდი 06 02 13)

შეზღუდული შესაძლებლობის მქონე პირთა სოციალური დაცვის პროგრამა (შემდგომში-პროგრამა) განსაზღვრავს ადგილობრივი ბიუჯეტიდან გარდაბნის მუნიციპალიტეტში რეგისტრირებული და მცხოვრები შეზღუდული შესაძლებლობის სტატუსის მქონე ბენეფიციარების სოციალური დახმარების გაცემის პირობებსა და პროცედურებს, მათ მიერ მუნიციპალიტეტის მერიაში წარსადგენი დოკუმენტაციის ნუსხას და დახმარების სახით გასაცემი თანხის ოდენობებს.

**მუხლი 1. პროგრამის მიზანი**

შეზღუდული შესაძლებლობის მქონე პირების, ასევე „ბავშვის უფლებების დაცვისა და მხარდაჭერის პროგრამის“ ბენეფიციარების მატერიალური მხარდაჭერა.

**მუხლი 2. დაფინანსების წყარო**

გარდაბნის მუნიციპალიტეტის ბიუჯეტი.

**მუხლი 3. პროგრამის ხანგრძლივობა**

პროგრამა ძალაშია 2024 წლის პირველი იანვრიდან 2024 წლის 31 დეკემბრის ჩათვლით.

**მუხლი 4. პროგრამით მოსარგებლე**

შეზღუდული შესაძლებლობის მქონე პირები:

- 1) 18 წლამდე ასაკის ბავშვები, რომელთაც აქვთ: დაუნის სინდრომი, ცერებრალური დამბლა, აუტიზმი, ლეიკემია, დიაბეტი, მხედველობის შეზღუდვა, მეტყველების შეზღუდვა, სმენადაქვეითებული და ეტლსმიჯაჭვული მდგომარეობა.
- 2) „ბავშვის უფლებების დაცვისა და მხარდაჭერის პროგრამის“ ბენეფიციარი შეზღუდული შესაძლებლობის სტატუსის მქონე 18 წლამდე ბავშვები (განურჩევლად დიაგნოზისა).
- 3) ეტლსმიჯაჭვული, მხედველობაშეზღუდული, მეტყველებაშეზღუდული და სმენადაქვეითებული შეზღუდულ შესაძლებლობის მქონე პირები.
- 4) „ბავშვის უფლებების დაცვისა და მხარდაჭერის პროგრამის“ ბენეფიციარი შეზღუდული შესაძლებლობის სტატუსის მქონე პირი, რომელიც არის ბავშვის მშობელი.

**მუხლი 5. პროგრამით მოსარგებლეების დაფინანსების ორგანიზება**

1. სოციალური დახმარების მისაღებად ბენეფიციარი წერილობითი განცხადებით მიმართავს და სრულყოფილ დოკუმენტაციას წარუდგენს მუნიციპალიტეტის მერს ან შესაბამის ადმინისტრაციულ ერთეულში მერის წარმომადგენელს. მიღებული დოკუმენტაცია შესასწავლად იგზავნება მერიის ჯანმრთელობის, სოციალური, ბავშვის უფლებების დაცვისა და მხარდაჭერის სამსახურში. „ბავშვის უფლებების დაცვისა და მხარდაჭერის პროგრამის“ ბენეფიციარის შემთხვევაში ბავშვის უფლებების დაცვისა და მხარდაჭერის განყოფილება წერილობით მიმართავს სამსახურს.

2. პროგრამა ითვალისწინებს წელიწადში ერთხელ შეზღუდული შესაძლებლობის სტატუსის მქონე ბავშვების (18 წლამდე) მატერიალურ დახმარებას 300 (სამასი) ლარის ოდენობით:

ა) შეზღუდული შესაძლებლობის სტატუსის მქონე ბავშვები (დაუნის სინდრომი, ცერებრალური დამბლა) - 21 მარტი;

ბ) შეზღუდული შესაძლებლობის სტატუსის მქონე ბავშვები (აუტიზმი) - 2 აპრილი;

გ) შეზღუდული შესაძლებლობის სტატუსის მქონე ბავშვები (ლექემია, ეტლსმიჯაჭვული, მხედველობა, მეტყველება და სმენადაქვეითებული) და „ბავშვის უფლებების დაცვისა და მხარდაჭერის პროგრამის“ ბენეფიციარი - შეზღუდული შესაძლებლობის სტატუსის მქონე ბავშვები (18წლამდე) - 1 ივნისი;

დ) შეზღუდული შესაძლებლობის სტატუსის მქონე ბავშვები (დიაბეტი) – 14 ნოემბერი.

3. პროგრამა ითვალისწინებს წელიწადში ერთხელ (3 დეკემბერი) შეზღუდული შესაძლებლობის მქონე პირების (18 წლის ზემოთ) მატერიალურ დახმარებას 300 (სამასი) ლარის ოდენობით:

ა) შეზღუდული შესაძლებლობის მქონე პირები (ეტლსმიჯაჭვული, მხედველობაშეზღუდული, მეტყველება და სმენადაქვეითებული);

ბ) „ბავშვის უფლებების დაცვისა და მხარდაჭერის პროგრამის“ ბენეფიციარი შეზღუდული შესაძლებლობის მქონე მშობელი.

## **მუხლი 6. მუნიციპალიტეტში წარსადგენი დოკუმენტები**

წარსადგენი დოკუმენტები:

ა) განცხადება;

ბ) შეზღუდული შესაძლებლობის მქონე ბენეფიციარის ან მისი კანონიერი წარმომადგენლის (მეურვე/მზრუნველი/ მხარდაჭერი) განცხადება;

გ) განმცხადებლის (შშმ პირის) პირადობის მოწმობის ასლი;

დ) ბავშვის დაბადების მოწმობის ასლი;

- ე) იძულებით გადაადგილებული პირის/დევნილის მოწმობის ასლი (იძულებით გადაადგილებული პირის/დევნილის მომართვის შემთხვევაში);
- ვ) შეზღუდული შესაძლებლობის მქონე ბენეფიციარის კანონიერი წარმომადგენლის (ასეთის არსებობის შემთხვევაში) პირადობის მოწმობის ასლი;
- ზ) სსე აქტის ამონაწერი ან/და ცნობა სოციალური მომსახურების სააგენტოდან შეზღუდული შესაძლებლობის სტატუსის შესახებ;
- თ) ცნობა ჯანმრთელობის მდგომარეობის შესახებ (ფორმა №IV-100/ა);
- ი) ბავშვის უფლებების დაცვისა და მხარდაჭერის განყოფილების წერილი „ბავშვის უფლებების დაცვისა და მხარდაჭერის პროგრამის“ ბენეფიციარების შესახებ;
- კ) საბანკო რეკვიზიტი.

### **მუხლი 7. ჯანმრთელობის, სოციალური, ბავშვის უფლებების დაცვისა და მხარდაჭერის სამსახურის უფლებამოსილება**

ჯანმრთელობის, სოციალური, ბავშვის უფლებების დაცვისა და მხარდაჭერის სამსახური შემოსულ დოკუმენტაციაზე დაყრდნობით ამზადებს ბრძანების პროექტს მუნიციპალიტეტის მერთან წარსადგენად, ხოლო განცხადებაში აღმოჩენილი ხარვეზის შემთხვევაში, მიმართავს განმცხადებელს ან/და მერის წარმომადგენელს ადმინისტრაციულ ერთეულში ხარვეზის აღმოსაფხვრელად.

### **მუხლი 8. სოციალური დახმარების გაცემის შესახებ საბოლოო გადაწყვეტილების მიღება**

#### **და დაფინანსება**

1. გარდაბნის მუნიციპალიტეტის მერიის ადმინისტრაციული სამსახურის იურიდიული განყოფილება უზრუნველყოფს ჯანმრთელობის, სოციალური, ბავშვის უფლებებისა და დაცვისა და მხარდაჭერის სამსახურის მიერ წარმოდგენილი გარდაბნის მუნიციპალიტეტის მერის ინდივიდუალური ადმინისტრაციულ-სამართლებრივი აქტის (ბრძანების) პროექტის სამართლებრივ ექსპერტიზას და ვიზირებას.
2. დახმარების გაცემის შესახებ საბოლოო გადაწყვეტილებას იღებს გარდაბნის მუნიციპალიტეტის მერი და გამოსცემს შესაბამის ინდივიდუალურ-ადმინისტრაციულ სამართლებრივ აქტს (ბრძანებას).
3. საფინანსო-საბიუჯეტო და შესყიდვების სამსახური თანხას გასცემს უნაღლო ანგარიშსწორებით ბრძანებაში მითითებულ საბანკო ანგარიშზე.

### **მუხლი 9. პროგრამის შედეგის ინდიკატორი**

პროგრამაში ჩართული შეზღუდული შესაძლებლობის პირთა რაოდენობა.

## **მუხლი 10. პროგრამის შედეგი**

შეზღუდული შესაძლებლობის სტატუსის მქონე ბენეფიციარის მატერიალური უზრუნველყოფა.